



REGIONE AUTÒNOMA DE SARDIGNA



Istituto Camillo Bellieni
Ricerca Formazione Conoscenza
Lingue Letterature Saperi Luoghi

Su conventu frantziscanu de Pàdria

Unu de sos logos prus atraentes e misteriòsos de Pàdria est su conventu frantziscanu, fraigadu in sos primos annos de su sèculu su de XVII, in su 1610, pro voluntade de sa contessa Isabella de Ferrera, figia de Pietro Onofrio de Ferrera, feudatàriu e signore de Pàdria, chi aiat postu a disponimentu terrinos e dinari. Ma puru sos padriesos aiant partetzipadu a su fràigu oferende sas rodias, chi fiant traballos e dies de traballu a s'indonu. Su conventu est istadu sede de sos padres frantziscanos finas a pagu prus o mancu a inghìriu de su 1870, cando a pustis de s'aprovatzione de su decretu règiu de su 7 de trìulas de su 1866, chi aiat ordinadu sa sessada de totu sos Òrdines e Corporatziones religiosas, e su patrimoniu issoro, de cale si siat ispètzia, est divènnidu proprietade de s'Istadu. S'ùrtimu guardianu de su conventu est istadu Padre Sarvadore Biosa.

S'edifitziu prima est istadu intituladu a sa Virgine de Itria, e a pustis a Santa Maria de sos Ànghelos. In s'interi de su sèculu su de XIX, est istadu impreadu de ogni manera, finas chi, in finitia de su sèculu, in su 1870, est istadu bèndidu a privados chi nd'ant fatu unu logu pro bivivet. A pustis, comporadu dae su Comune e torradu a acontzare, est divènnidu unu tzentru bellu meda, sede de medas iniziativas culturales. Sos acontzos ant postu in lughe, tra sas àteras cosas, sa bellesa de s'iscale in pedra. Ma sa particularidade prus manna de custu conventu est sa chi s'agatat in fundu de su passadissu, a pianu de istrada, a s'ala manca, ossiat un'ossaja antiga, in ue cun òrdine sunt dispostos ossos umanos, partzidos pro tipu. Custu nos faghet a pensare chi su terrinu a inghìriu de sa crèsia de Santa Maria de sos Ànghelos, a làcana cun su conventu frantziscanu, esseret unu campusantu, e chi sos ossos sunt istados agatados in sos traballos fatos pro fraigare su conventu.

Atividade contivigiada dae Maria Leonarda Correddu
Progetu "Èssere in sardu", annualidade 2016